

摘藻堂四庫全書薈要

集部

欽定四庫全書薈要

集部

御選元詩卷九

詳校官原任主事

臣李斯畹

欽定四庫全書薈要卷一萬八千四百二十一集部

御選元詩卷九

樂府歌行八

陳基

雞鳧行

雞與鳧皆鷖育鳧愛水遊雞愛陸鳧昔未辨雌與雄母
不顧之雞為伏雞渴不飲飢不啄以腹抱鳧誰敢觸鳧
脫鷖雞鼓翼日日庭中求黍稷啄啄呼鳧使之食鳧羽



日襜褕一朝下水不顧雞雞在岸鳧在水賦性本殊徒
爾耳雞知為母鳧不知恨不隨波共生死

白頭公詞

杜陵三月春風暖燕語鶯啼雜絃管落花撩亂紫騮嘶
平樂歸來酒尊滿雨急風簷忽已秋幽鳥多情亦白頭
不隨翡翠枝頭宿却愛鴛鴦水上游春去秋來不知老
安樂即多憂患少綺窓深處語言奇付與紛紛秦吉了

刈草行

原上秋風吹百草半青半黃色枯槁城頭日出光杲杲
腰鎌曉踏城門道門頭草多露未晞爾鎌利鈍爾自知
一人刈草一馬肥馬不肥兮人受笞城中官廩三萬匹
一匹日餐禾一石

新城行

舊城城舊人民新新城城新無舊人舊城城外兵一解
新城城中齊覆瓦萬瓦鱗鱗次第成將軍令嚴雞犬寧
將軍愛民如愛子百賈皆集新城市浙米淮鹽兩相直

楚人之弓楚人得何時四海無荆棘北賈販南南販北
裁衣曲

殷勤織紵綺寸寸成文理裁作遠人衣縫紉不敢遲裁
衣不怕剪刀寒寄遠唯憂行路難臨裁更憶身長短只
恐邊城衣帶緩銀燈照壁忽垂花萬一衣成人到家

邊城曲

莫啟匣中鏡怕見頭上雪莫放弦上箭怕射邊城月邊
城月缺還再圓頭上髮白何由元君不見自古邊城有

餘樂夜月聯詩畫
綦渠至今月照郾城頭
相國功名齊斗牛

織錦篇

絡緯秋啼金井根
佳人當窓織鳳麟
流雲拂拭春無痕
頃刻化作鴛鴦文
銀漢含風星斗搖
虛空迸出黃盤雕
為君裁作宮錦袍
奪得當年盧肇標
妾家本住牽牛渚
與君誤結同心縷
人間怪多離別苦
夢落陽臺不成雨
腸斷無心為君織
向君拋却支機石
何時頭戴蓮花巾

相伴雙成禮白雲

烏夜啼引

并序

閩人王昉為淮東元帥府奏差被誣繫獄部使者
使泰州尹趙子威謝之平反其寃

烏夜啼在庭樹烏啼啞啞天欲曙阿兒被誣身繫獄盡
室煩寃受荼毒烏啼何為繞吾屋下堂喚婦起聽烏忽
喜淮南兒有書書中報道兒罪脫此樂欣欣天下無兒
歸拜母為母說泰州使君當世傑執法霜臺舊司臬明

如青天皎如月冤獄平反解縲紲已死得生誣得雪海
可枯山可裂使君之德不可滅烏啼愛我庭樹枝我愛
使君君不知使君歸朝奉天子日日聽烏為君喜

次韻趙君李文贈杜寬吹觥策吟

寒竹初栽蘆葉秋夜吹百花洲上樓千金縱有狐白裘
難買杜寬一藝優妙知音律能周鏤薛家小童安敢侔
江空月白爛不收冥搜罔象悲陽侯哀泉鳴咽秦隴頭
何年變曲為涼州神工太古開黃牛驚浪出峽風颭颭

落葉秋隨渭水流
渭水有盡情無休
緜緜又若繭緒抽
要眇寧以智力求
須臾水激龍騰湫
熊羆黑夜咆魑魅
愁勸君不用皓齒謳
側耳聽此消百憂
寬也胡為淹此留
自合天上參鳴球
飄然我欲歸帝丘
仙人張樂煙霧浮
蒼龍為車挾翠蚪
千秋萬歲遲子同
遨遊

君住耶溪南

君住耶溪南
我住耶溪北
咫尺不知名
采蓮始相識
君愛蓮有花
我愛蓮有實
花實本同根
君心勿相失

送君當遠涉

送君當遠涉蘭舟桂為檝君去不思家妾夢長相接采
蓮將遺君采花不采葉妾貌不如花君心不如妾

貞女慎行露

貞女慎行露君子戒履霜歲暮懷百憂離居增慨慷方
舟豈無楫河水亦可杭臨流不能渡佇立以徬徨

鴻雁篇

鴻雁雙雙度雁門相呼相喚不離羣晝銜蘆翟防矰繳

夜宿關河同夢魂稻梁既足江南闊秋水增波葉微脫
洞庭湖畔卧雲沙彭蠡磯頭弄煙月一朝無事忽相違
一向東飛一向西西飛渺渺秦山曲東去悠悠滄海湄
秦山滄海遙相望顧影徘徊各惆悵山有猩猩與網羅
水有蛟鼉與風浪回頭却恨不同棲辛苦皆因獨自飛
不問天南與天北何時相見得同歸

山高寄陸元素

謂山高兮其上有天謂地厚兮其下有泉天不可升兮

地不可極我思古人兮為之太息古之人兮為誰山之
中兮水之湄孤舟兮容與俯狎步兵兮仰招鷗夷非夫
人兮爾曷從之

青絲絡馬頭送李彥章

青絲絡馬頭游宦古蘇州蘇州城東萬斛舟前年運米
直沽口送別江頭折楊柳承恩頭插上陽花錫宴尊傾
光祿酒江上今年楊柳黃辟書千里有輝光勇騎閩外
將軍馬飽食閩中荔子漿閩中女兒歌白苧把酒勸君

起為舞將軍好文不好武自古閩中稱樂土

張憲

鴻門會

雲成龍氣成虎椎鼓撞鐘宴真主披帷壯士髮指冠側
盾當筵請公舞白髮老臣心獨苦玉玦三看君不語五
星東井夜聯珠天狗欃槍落如雨鴻溝咫尺接鴻門千
里神騅一夜奔君不見龍泉影裏重瞳瞽玉斗聲中五
體分

東門行

東都門外今古稀東宮二傅同日歸百官祖道設供帳
敕賜黃金作酒貲歸來日日會親友盡賣賜金買醇酒
白頭剛傅蕭望之也空勞勞一杯鴟羽不就獄博得君王祠
少牢

梁父吟

武侯成就關張勝晏子
殺三士多矣故反其詞

伏龍隱南陽高卧久未起不肯渡長江焉能涉漳水炎
炎火絕卯金刀巍巍土王當塗高種瓜兒子不力戰織

履郎君無地逃伏龍一起捍坤軸雄據西南成鼎足十
年汗血戰元黃五出王師爭九六萬人之敵兩熊虎百
戰辛勤事行伍河南河北謾稱雄不得袁曹一丸土伏
龍纔起帝業新千古君臣魚水親遂使真龍全羽翼風
雲成就二將軍

行路難

行路難前有黃河之水後有太行之山車聲宛轉羊腸
坂馬足蹭蹬人頭關白日叫虎豹腥風啼狗狴拔劍顧

四野使我摧心肝東歸旣無家西去何時還行路難重
咨嗟乞食淮陰市報仇博浪沙一劍不養身千金徒破
家古來未際皆紛拏行路難多岐路馬援不受井蛙囚
范增已被重瞳誤良禽擇木乃下棲不用漂流歎遲暮

房中思

紅象作小梳髻龍盤漆髮香泥擣守宮染透桃花骨白
馬不歸來倚床弄紅拂桂陰綠團團坐對玲瓏月

銅雀妓

陵樹日沉西秋風石馬嘶芳尊傾蕙帳詎肯濕黃泥慘
慘笙歌合遙遙望眼迷玉人脆如草能得幾回唬

端午詞

榴花照鬢雲髻熱蟬翼輕綃香疊雪一丈戎葵倚繡窓
雨足江南好時節五色靈錢傍午燒綵勝金花貼鼓腰
段家橋下水如潮東船奪得西船標櫂歌聲靜晚山綠
萬鎰黃金一日銷

白苧舞詞

吳宮美人青犢刀自裁白苧製舞袍輕雲冉冉白勝雪
激楚一曲回風高九雛鳳釵簪紫玉長裾窄腰蓮步促
翩翩素袖啟朱櫻金籠鸚鵡飛來熟館娃樓閣搖春暉
臺城少年醉忘歸瑤窓繡戶鎖風色桃樹日長蝴蝶飛
傾城獨立世希有罷吟綠水停楊柳急管繁絃莫苦催
眞珠賸買烏程酒

秋夢引

翠翹半蟬雙飛鳳轆轤金井懸銀甕萬絲翠霧刷鴉光

兩點秋波和淚送芙蓉帶露不忍折鸚鵡陽籠時自哢
多情宋玉正悲秋故放香魂入秋夢

楊花詞

東風吹春春不醒桃花杏花空娉婷萬絲翦綠暗如霧
千里相思長短亭亭前女兒十六七手挽柔條背春日
六街馬蹄蹋黃塵雪花漫天愁殺人

當爐曲擬梁簡文帝

初八月上弦十五月正圓當爐設夜酒客有黃金錢懽

濃易得曉別速動經年相送大堤上舉杯良可憐

胡姬年十五擬劉越石

胡姬年十五芍藥正含葩何處相逢好并州賣酒家面
開春月滿眉抹遠山斜一笑既相許何須羅扇遮

春晝遲

樓觀參差半空起縹緲闌干煙霧裏綠萍一道浸鴛鴦
笑聲只隔桃花水柳下粉牆斜靠街當晝紅門半扇開
游絲冉冉挂簷角燕子一雙何處來

江南弄

菱尾蒲芽水新足沙暖小桃紅夾竹誰家燕燕倦東風
戢翼畫梁春睡熟螭頭舫子載醺醪勿惜千金買詞曲
明朝風雨蔽九川千里江南芳樹綠

瑤池曲

曼倩啼飢桃未熟綺窓珠樹層陰綠上清童子晝臨闌
鸞尾掃雲方種玉芙蓉畫闌春晝長簫韶一派起回廊
八龍未暇送周穆三鳥遽能迎漢皇風雨蒼蒼隔元圃

不勞西望祠王母贈君桃核大如杯歸植茂陵陵上土
子夜吳聲四時歌

朱雀街頭雨烏衣巷口風飛來雙燕子不入景陽宮為
問秦淮女還知玉樹空

湖上水雲綠荷花十里香咿啞木蘭櫂驚起睡鴛鴦雌
雄兩分去不覺斷人腸

白苧鴉頭鞵紅綾錦勒靴玉階零露冷差折鳳仙花去
去蕩遊子秋深不念家

瓦上松雪飛
鐙前夜有聲起
持白玉尺呵手製
吳綾纔
紉征袍縫邊庭草又青

估客行

發舟石頭城
繫舟梅根渚
江月夜寥寥
照見家人語
割裳製家書
刺指題日月
不知何時到
但記今朝發

紅門曲

紅門欲開人漸稀
棲烏啞啞漫天飛
西宮寶燭明如晝
玉筵圍坐諸嬪妃
黃羊夜剝博兒赤
金椀銀鐺進魚炙

銀漢依微白玉橋
隔花宮漏夜迢迢
內城馬嘶丞相朝
烏納罕元帥斬新李行

中原惡少稱新李
八尺長軀勇無比
鐵槍丈二滾銀龍
白面烏騅日千里
攻州劫縣莫敢撓
烏羊渾脫縵胡纓
輕車壯士三十兩
戰則為陣屯為營
殿前將軍不敢搏
羽林孤兒甘受縛
柳林道上掠寶車
獨樹堆邊劄氊幕
吐蕃老帥西南來
虎頭不挂三珠牌
敝裘羸馬失故態
寶刀鏽澀盛生埃
步入中書謁師相
願請長纓三百丈

生縛克魁獻至尊不使朝廷乏名將相臣入奏大明宮
玉音特賜天廐驄親軍百騎備兩翼綵旗盡出東華東
硬弓二石力逾弩長驅夜走涿城下土岡無樹著伏兵
兩陣相當如怒虎彎彎弓弰抱團月點點槍尖飛急雪
神騅未隨白羽仆賊顱已逐青萍缺一騎平原報捷歸
天狗有聲流作血

北庭宣元杰西番刀歌

此刀乃江浙平章教
化公征淮西所佩者

金神起持水火齊煅鍊陰陽結精銳七月七日授冶師

手作鉗鋌股為礪一千七百七十鋒脊高體狹刀口洪
龍飛蛟化歲月久阮師舊物今無蹤呱哇繡鑲柔可曲
東倭純鋼不受觸賢侯示我西番刀名壓古今刀劒錄
三尖兩刃圭首圓劒脊黝黝生黑煙朱砂斑痕點人血
雕青皮軟金鈎聯唐人寶刀誇大食於今利器稱米息
十年土剝松紋生戎王造時當月蝕平章遺佩固有神
朱高固始多奇勲三公重器不虛授往繼王祥作輔臣

莫種樹

莫種樹種樹枝葉多枯楊易生梯鈍斧難伐柯秋風動
悲思春月夜如何

贈鵠碑王生歌

太湖之水通吳淞綠波冷浸青芙蓉巨靈神斧斫不去
帝命留與歷代賢聖鵠奇功奇功曠世信希有至德乃
可齊不朽嗟哉王生習此藝功德不逢長袖手虞黃歐
揭牛毛多筆端佞語如懸河銀鈎鐵畫街奇麗天下匠
石勞龔磨王生手握三寸鋼肥深瘦淺能自量神椎輕

重心應手白蟲食鐵森成行詞嚴筆勁逼晉漢學士何
人美詞翰窅亭五彩護龜趺峙立通衢人不看人不看
恐淚垂晉朝羊公今為誰高山深水苦自置後世誰人
想見之王生王生女當知功德豈在多文辭君不見延
陵季子碑上僅十字千載萬載生光輝

陳秀民

吳中柳枝詞

館娃宮中花似雪館娃宮外酒如春花前把酒花下醉

莫遣春愁惱殺人

姑蘇城邊楊柳絲千絲萬絲垂參差柳絲雖長不禁手
難織迴文錦字詩

木蘭含芳西塢西吳儂出遊知未知只恐過時不采摘
零落將隨秋草萎

白日欲暮入空房手把銀燭照西窓繡幃芙蓉開兩兩
金屏翡翠立雙雙

送遠曲

誰令車有輪去年載客西入秦誰令馬有蹄今年載客
過遼西車輪雙馬蹄四念君獨行無近侍婦人由來不
下堂側身西望涕沾裳恨不化為雙玉璫終日和鳴在
君旁

西湖竹枝歌

鴛鴦宛在水中央恰似阿儂初嫁郎擲却郎君金彈子
勸郎切莫打鴛鴦

姑蘇竹枝詞

吳門二月柳如眉
誰家女兒歌柳枝
歌聲嫋嫋嬌無力
恰如楊柳好腰肢

方行

楊柳詞

韶華無限暗中消
搖蕩春光幾萬條
却怪晚來風定後
雪花飛滿赤欄橋

曲江南陌亂垂煙
勾引春風入管絃
惆悵幾株憔悴盡
與人長繫別離船

清麗曲

江花繞瓊闕綠水帶朱樓開宴坐清夜飛觴凌素秋美人明月珮仙客紫雲裘生世真飄忽應當秉燭遊

東歸謠送貝仲矩回吳中

天目青逾藍上有危峯橫空插漢高巉巖滄海深莫測下有六鰲迭負蓬萊方丈於其側山峻極兮水波瀾千盤萬折行路難愁看混沌開鑿處尚有斧跡留人間父山仙翁髮如雪胸蟠太和吐日月手中煉石輕女媧五

色曾將補天裂憶間羽客從之遊青霞光亂雲錦裘金
雞叫海白日慘桂樹四落空山愁昔年寒月照樽俎明
珠百斛輕於土君山鐵笛悲向人羞殺堂前柳枝舞君
歸東吳懷故廬明星古宅非吾居會稽泱泱淞江險誰
探千載太史禹穴之遺書興因東歸發遂作東歸謠他
年相憶五情熱應知淚濕雙龍綃

和馬貫五松小龍女歌

五松小姑龍帝女綽綽飛璫夜行雨天吳移海醉不歸

江色千年作誰主
漂星輾月流翠滑
青霓曳裾玳窓八
同心縷結寄玉郎
複疊氎氎製霞襪
玉罌轉水月獨漉
絳綵香裾感蘭屋
閒擲明珠贈宓妃
一片長眉寫新綠
罌愚瑤殿罩何年
排空鳳管衝九天
割鮮不食起鳴絃
水波帖玉無驚煙

江南詞

暖氣晴嬌杜若洲
沙頭狂客繫蘭舟
采蘋多少江南女
搖蕩春光不自由

劉仁本

戍婦吟

夫君在邊戍，妾身守孤幃。
欲往備紉櫛，不如頻寄衣。
衣到恐遲遲，不到妾不知。
欲知衣未到，無明年鴻雁歸。

楊維禎

城西美人歌

并序

丙戌花朝後一日，與客遊長城之靈山，宴於城東。
老人所時偕遊者，城中美人靈山秀也。酒酣作城

西美人歌

長城嬉春春半強杏花滿城散餘香城西美人戀春陽
引客五馬青絲韁美人有似真珠漿和氣解消冰炭腸
前朝丞相靈山堂雙雙石郎立道旁當時門前走犬馬
今日丘壑登牛羊美人兮美人舞燕燕歌鴛鴦蜻蜒蚨
蜨爭飛揚東城老人為我開錦障金盤薦我生櫝榔美
人兮美人吹玉笛彈紅桑為我再進黃金觴舊時美人
已黃土莫惜秉燭添紅妝

崔小燕嫁詞

闔閭城中三月春流鶯水邊啼嚮人崔家姊妹雙燕子
踏青小靴紅鶴嘴飛花和雨著衣裳早裝小娣嫁文央
離歌苦惜春光好去去輕舟隔江島東人西人相合離
為君歡樂為君悲

長洲曲

長洲水引東江潮潮生暮暮還朝朝只見潮頭起郎施
不見潮尾回郎橈昨夜西溪買雙鯉恐有郎槭寄連理

金刀剖腹不忍食尺素無憑膾還委西溪之水到長洲
明日啼紅臨上頭

內人吹簫詞

為顧瑛題
盛子昭畫

天寶年來教春坊紫雲製曲吹寧王美人何處竊九漏
耳譜亦解傳伊涼鵲絃轉斷黃金軸獨據胡床弄橫玉
冶情忽逐野鶯飛十指紅蠶迷起伏御溝水暖浴鷓鴣
天地久無征戰聲芙蓉楊柳自搖落豈識黃雲邊塞情
西樓今夜月色午內人思仙望河鼓白日蕭條鳳不來

井梧風動神鳥語

奔月卮歌

為茅山外史
張伯雨賦

神犀然光射方諸海水拆裂雙明珠大珠飛上玉兔白
小珠亦奔銀蟾蜍千年太陰鍊成魄豈識妖蜮吞啖厄
剗胎乃隨歡伯計玉斧椎開桃扇核茅山外史海上來
拾得海月稱奇哉按劒或為龍鬼奪擲手自戲仙人杯
雄雷雌電繞丹屋顧兔清光吞在腹醒來不記墨淋漓
塵世隨風散珠玉鐵崖仙客氣如虹金橋銀橋游月宮

素娥飲以白玉醴羽衣起舞千芙蓉居然月宮化鮫室
坐見月中清淚滴我方醉卧玉兔傍但覓大魁酌天漿
不用白兔長生藥不用千年不死方

簫杖歌

為永嘉璣天
則道人賦

空心勁草琅玕節瘦如筆枝赤如鐵壺公手中曾擲之
黃公石上飛星裂璣天道人雙眼青見之不減九節藤
神丁未窺渾沌竅中有萬壑銅龍聲道人親鑿崆峒玉
九漏玲瓏尺度足黑蛇飛來膝上橫道人手中嘯鸞鵠

自言奇音不敢作寒星隨地風折岳去年臺山解虎鬪
今年狼山敲豸角鐵崖相見洞庭東腰間遂佩蒼精龍
湘江雨脚吹雌風相呼道人木上座杖陂水拔鬚眉峯

湖龍姑曲

湖風起浪如山銀城雪屋相飛翻白鼉豎尾月中泣倒
卷君山輕一粒浪中拍碎岳陽樓萬斛龍驤半空立雨
工騎羊鞭迅雷紅旗白蓋蚩尤開青蛾鬢髮紅藍腮紫
絲絡頭雙黃能神絃歌急龍姑來

修月匠歌

并序

按酉陽雜俎太和初有王秀才遊嵩山迷道見一人枕幞而坐曰君知月乃七寶合成乎月勢如丸其影則日爍其凹處也常有八萬三千戶修之予即一數因作修月匠歌

天公弄丸七寶鈿脆如琉璃拆如線月中匠人八萬戶
敕賜仙廚瓊屑飯什什伍伍入杳冥妙手持天輕欲旋
千斤寶斧運化鈞渾沌皮開精魄見羿家奔娥太輕脫

須臾踏破蓮花瓣十二山河影碎中輪郭重完冰一片
縹緲長懸玉白飛堅牢永結妖蠶患封辭何用蠨蛸臣
功成萬古蒙天眷一歸蘭路不知年兔子花開三萬徧

花游曲

并序

至正戊子三月十日偕茅山貞居老仙玉山才子
煙雨中游石湖諸山老仙為妓者瑀英賦點絳唇
詞已而午霽登湖上山歇寶積寺行禪師西軒老
仙題名軒之壁瑀英折碧桃花下山予為瑀英賦

花游曲而玉山和之

三月十日春濛濛滿江花雨濕東風美人盈盈煙雨裏
唱徹湖煙與湖水水天虹女忽當門午光穿漏海霞裙
美人凌空躡飛步步上山頭小真墓華陽老仙海上來
五湖吐納掌中杯寶山枯禪開茗椀木鯨吼罷催花板
老仙醉筆石闌西一片飛花落粉題蓬萊宮中花報使
花信明朝二十四老仙更試蜀麻箋寫盡春愁子夜篇

采菱曲

若下清塘好清塘勝若耶鴛鴦飛鏡浦鷓鴣睡銀沙兩
槳夾螳臂雙榔交犬牙照波還自惜艷色似荷花袖惹
紅萍濕裙牽翠蔓斜大堤東過客背面在蒹葭日落江
風起清歌雜笑哇

春芳曲

春容不再芳春華不再揚我欲倩游絲花前繫春陽春
陽不可繫游絲徒爾長飛來雙蛺蝶綴我羅衣裳頓足
起與舞上下隨春狂

鬪雞行

兩雄勇銳誇匹敵老距當場利如戟
鬪毳毼纏刺張怒咽礧礧嗔睛碧
劍心一動碎花冠口血相汙膠綵翼
何當罷鬪作啼聲埭上梨花春露滴

殺虎行

并序

劉平妻胡氏從平戍零陽平為虎擒胡殺虎爭夫
千載義烈有足歌者猶恨時之士大夫其作未雄
故為賦是章

夫從軍妾從主夢魂猶痛刀箭瘢況乃全軀飼豺虎拔
刀誓天天為怒眼中於菟小於鼠血號虎鬼冤魂語精
光夜貫新阡土可憐三世不復仇泰山之婦何足數

飲馬窟

長城飲馬窟飲馬馬還驚寧知鳴咽水猶作寶刀鳴

連理枝

主家連理木昨夜一枝零野藤沿別樹相託萬年青

玉蹄騶

銀腦玉蹄騶金鞭問妾家窓開桃葉渡小艇在荷花

商婦詞

蕩子發航船千里復萬里願持金剪刀去剪西江水
郎去愁風水郎歸惜歲華吳船如屋裏南北共浮家

春波曲

家住春波上春深未得歸桃花新水長應沒浣花磯

采蓮曲

東湖采蓮葉西湖采蓮花一花與一葉持寄阿侯家

楊柳詞

楊柳董家橋鵝黃幾萬條行人莫到此春色易相撩

賭春曲

關草歸來後開筵又賭春堦前撒珠戲誰是得雙人

樓妝

記洛陽有樂姓者撒真珠為戲厚盈數寸以班螺令妓
女酌之仍各具數以得雙者為勝得雙妓乃作雙珠宴
以勞
主人

玉鏡臺

郎贈玉鏡臺妾挂菱花盤安得咸陽鏡照郎心肺肝

閒雁篇

樓頭閒過雁隻影不成雙一夜狂夫夢相隨到九江

買妾言

買妾千黃金許身不許心使君閒有婦夜夜白頭吟

歸客誤

夜間歸客騎玉轡鳴匣唳喚婦開西窓秋風響桐葉

自君之出矣

自君之出矣燕去復燕歸思君如荔帶日日抱君衣

自君之出矣草青復草黃思君如魚鱗日日守君房

吳子夜四時歌

效劉琨
體作

麴塵波欲動紅心草已生朝來夾城道流車如水行
睡起珊瑚枕微風度屨廊芙蓉最高葉翻水洗鴛鴦
秋風吹羅帷玉郎思寄衣多情雙絡緯啼近妾寒機
樺煙噓席暖不知寒漏長朝來玉壺冰為君添衣裳

陽臺曲

月落望夫山高臺十二鬟楚宮多妬女雲雨夢中還

焦仲卿妻

生為仲卿婦死與仲卿齊廬江同樹鳥不過別枝啼

小臨海曲

日落洞庭波吳娃蕩槳過道人吹鐵笛風浪夜來多
道人鐵笛響半入洞庭山天風將一半吹度白銀灣
仙橋大如斗浮之過洞庭江妃渾未識喚作楚王萍
海客報奇事青天火甕飛明朝雷澤底新有落星磯
網得珊瑚樹移栽瑪瑙盆夜來風雨橫龍氣上珠根

海上雙雷島渾如灩澦堆
垂龍拔山脚飛渡海門來
潮來神樹沒潮歸神樹青
雲裏天妃過龍旗帶雨腥
客入毛公洞洞深人不還
明年探禹穴相見會稽山
太液象圓海金蓮夜夜開
水中萬年月照見昆明灰
秦峯望東海雲氣常飄飄
桑田明日事奚用石為橋

桂水五千里

桂水五千里瀟湘雨氣空
衡山七十二望見女英峯
桂水五千里南風大府開
象王新貢入鮫女送珠來

西湖竹枝歌

并序

余閒居西湖者七八年與茅山外史張貞居茗溪
鄭九成輩為唱和交水光山色浸沈胸次洗一時
尊俎粉黛之習於是乎有竹枝之聲好事者流布
南北名人韻士屬和者無慮百家道揚諷諭古人
之教廣矣是風一變賢妃貞婦興國顯家而烈女
傳作矣采風謠者其可忽諸至正八年秋七月會
稽楊維禎書於玉山草堂

蘇小門前花滿株
蘇公堤上女當壚
南官北使須到此
江南西湖天下無

鹿頭湖船唱
報郎船頭不宿野
鴛鴦為郎歌舞為郎死
不惜真珠成斗量

家住西湖新婦磯
勸君不唱縷金衣
琵琶原是韓朋木
彈得鴛鴦一處飛

湖口樓船湖日陰
湖中斷橋湖水深
樓船無柁是郎意
斷橋無柱是儂心

病春日日可如何起向西窓理琵琶見說枯槽能卜命
柳州衙口問來婆

小小渡船如缺瓜船中少婦竹枝歌歌聲唱入空侯調
不遣狂夫橫渡河

勸郎莫上南高峯勸儂莫上北高峯南高峯雲北高雨
雲雨相催愁殺儂

石新婦下水連空飛來峯前山萬重不辭妾作望夫石
望來或似飛來峯

望郎一朝又一朝信郎信似浙江潮浙江潮信有時失
臂上守宮無日消

吳下竹枝歌

三箸春深草色齊花間蕩漾勝耶溪采菱三五唱歌去
五馬行春駐大堤

家住越來溪上頭
鰼脂塘裏木蘭舟
木蘭風起飛花急
只逐越來溪上流

寶帶橋西江水重
寄郎書去未回儂
莫令錯送回文錦

不答鴛鴦字半封

馬上郎君雙結椎百花洲下買花枝
畧畧冠子高一尺
能唱黃鶯舞雁兒

白翎鵲操手雙彈舞罷胡笳十八般
銀馬杓中勸郎酒
看郎色似赤瑛盤

騎馬當軒鵠紫靴西風馬上鼓琵琶
內家隊裏新通籍
不是南州百姓家

小娃十歲唱桑中盡道吳風似鄭風
不信柳娘身不嫁

眞珠長絡守宮紅

燕子詞

燕子來時春雨香
燕子去時秋雨涼
鴛鴦一生不作客
夜夜不離雙井塘

燕子樓頭入妾家
燕來燕去惜容華
祇應韓重相思骨
化作湖中並蒂花

小游仙詞

東華塵又起瀛洲
十屋今添第幾籌
阿母西來騎白鳳

蛾眉相見不勝秋

麻姑今夜過青丘玉醴催斟白玉舟莫向外人矜指爪
酒酣為我擘箜篌

曾與毛劉共學丹丹成猶未了情緣玉皇敕賜西湖水
長作西湖月水仙

青旄節衛翠雲輶按部東行過赤城龍女遺珠雞卵大
結為雙佩賜方平

若木西來赤岸東白金城闕碧珠宮天家令急不敢住

折得五花歸飯龍

東逾弱水赤流深夜得桃都
息羽旌地底日迴天上去
金雞如鳳自交鳴

去妾詞

萬里戎裝去琵琶上錦韉
傳來馬上曲猶唱想夫憐

紅酒歌

謝同年智
同知作

楊子渴如馬文園宰官特賜
桃花源桃花源頭釀春酒
滴滴真珠紅欲然左官忽落
東海邊渴心鹽井生炎煙

相呼西子湖上船蓮花博士飲中仙如銀酒色未為貴
令人長憶桃花泉膠州判官王牒賢憶昔同醉瑯林筵
別來南北不通問夜夢玉樹春風前朝來五馬過陋廛
贈以同袍五色彩副以五鳳樓頭牋何以澆我磊落抑
塞之感慨桃花美酒斗十千垂虹橋下水拍天虹光散
作真珠涎吳娃鬪色櫻在口不放白雪盈人顛我有文
園渴苦無曲奏鴛鴦絃預恐沙頭雙玉盡力醉未與長
瓶眠徑當垂虹去鯨量吸百川我歌君扣舷一斗不惜

詩百篇

聽鸞曲

紫騮踏花雲滿足南陌東阡日馳逐不如幽谷黃衣郎
好音綿蠻出深木鄰家女兒愁別離楊花恰傍珠簾飛
樓前關山人未歸奈何奈何啼黃鸝

蓮花垞歌

垞在太湖之西薊氏村
垞或作垞山川峭絕處

棟花風殘啼鴂舌蓮花垞上春三月垞上女郎齊踏歌
輕衫白苧飄香雪青山深鎖薊家村使君艇子恰當門

門前滿樹櫻桃子手摘櫻桃招使君使君本是龍門客
身脫宮袍岸烏幘何處江南最有情新買蓮花埭上宅
王蓮曲為金陵張氏妓賦

芙蓉出五沃蕩漾水中央託根遍七澤濯影照滄浪亭
亭立於泥靜試岳井粧使君青雀舫夜夜宿花傍為結
明璫蓋覆此並頭芳洛妃解瑤珮王母薦瓊觴飢餐玲
瓏玉渴飲醍醐漿白日忽成晚粉面落秋霜窟宅不結
子柔絲斷藕腸波寒沉懶傘愁殺野鴛鴦

用韻復雲松老人華陽巾歌

君不見獬豸不識字高柱削鐵堅白簡孰辨賢不賢又
不見鷄鵠偏尚武高屋壓虎肩五兵不理長酣眠鐵崖
老狂者強項如董宣小巾製子夏正要江東傳人間緋
紫擅已蛻風中蟬脫巾漉酒東籬邊吳淞老褐來賀我
倒冠共醉春風前我歌此歌君拍手東壺西閤開洞天
洞天之鶴為我雙回旋

老客婦謠

老客婦老客婦行年七十又一九少年嫁夫甚分明夫
死猶存舊箕帚南山阿妹北山姨勸我再嫁我力辭涉
江采蓮上山采蘼采蓮采蘼可以療饑夜來道過娼門
首娼門蕭然驚老醜老醜自有能養身萬兩黃金在纖
手上天織得雲錦章繡成願補舜衣裳舜衣裳為妾佩
古意揚清光婢妾不是邯鄲娼

邯鄲美人

為趙娘
賦也

邯鄲市上美人家美人小襪青月牙繡靴對著平頭鴉

平頭鴉蹋場下包銀壺馱細馬

裙翻柳脚垂青空水花吹亂秋芙蓉須臾氣喘如渴虹
如渴虹索銀癭轉轉轆轤飲金井

素雲引為元霜公子賦

元霜黃溪呂氏月臺名也

清河美人姑射神夢中認得梨花雲朝朝暮暮不肯雨
瑤枝玉葉光輪困艷妝不染臘脂水輕歌欲遏鸞笙起
五花細馬馱春風羅帶飄飄白鷗尾柔情易逐綵霞空
半掩春衣嘶玉龍九點峯前指歸路家住松陵東復東

桃葉桃根春已暮又逐飛花度江去梨園昨夜春雨多
回首孤飛在何處何處孤飛去復來直是元霜百尺臺
春愁曲

小樓日日聽雨卧輕雲作團拂簾過金黃楊柳葉初勻
雪色棠梨花半破東家蝴蝶飛無數西鄰燕子來兩個
玉關萬里尺書稀春風不似春愁大

義仲以吳之柳枝詞答為賦詩

吳中柳枝傷春瘦湖中竹枝湘水愁說與錢塘蘇小小

柳枝愁是竹枝愁

四景宮詞

漏痕新長蓮花斗龍池草色連溝柳憶春還又怯春來
日日春情殢如酒小牀偷製錦迴文落地鍼聲暗驚手
夢繞梁三白蝶飛西園鼓子花開後

金刀落雪瓜如斗小殿風來水楊柳鳳窠長簾不成眠
竊飲君王千日酒傳宣今夜吹玉笙十指紅蠶捻輕手
三十六竿調未齊小倚琉璃御屏後

露下金盤濕星斗池上烏啼千尺柳秋題未寫桐葉箋
春妝尚帶桃花酒十二簾開乞巧樓小隊金針穿好手
長生殿裏記恩私夜半牽牛挂樓後

黛螺新賜量成斗畫眉日畫青青柳長得君王一笑看
眠文不敢朝忤酒盤珠夜製袞龍衣紅冰笋軟呵纖手
坐聽鐙人報曉籌二十五聲寒點後

鳴箏曲

斷虹落屏山斜雁著行安釘鈴雙啄木錯落千珠拌愁

龍啼玉海夜燕語雕闌只應桓叔夏重起為君彈

夢遊滄海歌

東海之東去國十萬里其洲名滄洲地方五百里上有
瑤濤玉浪出沒九岫如羅浮風光長如二三月琪花玉
樹不識人間秋人鳥戲天鹿昆吾鳴天球橘子如斗蓮
葉如舟白鳳如雞紅鱗如牛青瞳綠髮紫綺裘日夕洲
上相嬉遊鐵崖道人隘九州凌風一舸來東漚始青天
開月如雪錦袍著以黃金樓樓中仙人睨物表瑤笙引

鶴緱山頭戲弄玉如意擊碎珊瑚鉤相招元處士浩歌
海西流長梯上摘七十二朶之青苗玉龍呼畊三萬
六千頃之崑崙丘黃河清淺眼中見海屋老人為我添
新籌

錢惟善

春游曲

蛾眉曉壓黛雲冷蟻波淥泛秋蛇影千金難買能賦人
轆轤聲沈舊宮井青絲不梳慵蚤起十二螺鬟翠相倚

鸚鵡解言天上愁紅雨香漂御溝水義車急急催飛光
杯中淺深愁短長東鄰誰唱斷腸曲游絲落絮春茫茫

西湖竹枝詞

貧家教妾自當壚馬上郎君不敢呼折得荷花待誰贈
葉間紅淚滴成珠

春日高樓間竹枝梨花如雪柳如絲珠簾不被東風捲
只有空梁燕子知

日暮天寒野水濱孤山愁絕四無鄰誰家處子如冰雪

行傍梅花不見人

阿姨住近段家橋
山妬蛾眉柳妬腰
東山井頭黑雲起
早回家去怕風潮

楚人弓

楚人弓懸兩石五十萬
矢陷強敵絳人弓箭三隻長
歌入關成偉績
多箭不如少箭力
制敵若在弓矢間
鳴條牧野高於山

國馬足

國馬足吉行五十轡如沃天馬足一日千里更神速國
馬天閑飽芻粟太行鹽車天馬哭

長安道

車馬如流水樓臺結綵虹王孫來戚里豪士遇扶風不
覩衣冠盛空閒意氣雄
鵞肩亦何事日暮醉新豐

關山月

落落漢時月蕭蕭古戰場揚輝子卿節逐影細君裝高
映玉關外低沉青海傍不似閨中夜祇照繡鴛鴦

折楊柳

何處好楊柳攀條贈遠行
花飛渡江水客醉蹋歌聲
秋色彫榆塞春陰接鳳城
一枝不敢折為近亞夫營

張昱

行路難

鴻雁及秋來元鳥先社去
俱生亭毒內羽翼乃不遇
翔者不知水流者不知山
世事每如此人生行路難

美女篇

燕趙有美女紅蓮映綠荷
珮環彫夜玉團扇畫春羅
流盼星光動曳裾雲氣多
回車南陌上誰不駐鳴珂

晚春詞

暄風日夜起春到亦已久
清晨卷簾坐惆悵閨中婦
憑闌暗垂淚對花嬾擡手
昨宵夢夫婿白馬章臺走
結成合歡帶自置妾懷袖
覺來風張幔啼鳥在高柳
空織迴文錦佳期竟何有

織錦詞

行家織錦成染別牡丹花紅杏花白作雙紫燕對銜春
一足錦成過半月持來畫堂卷復開佳人細意為剪裁
銀鐙連夜照針黹平明設宴章華臺為君著衣舞垂手
看得風光滿楊柳蝶使蜂媒無定棲萬蕊千花動衣袖
回回舞罷換新衣新衣未縫錦下機憐新棄舊人所悲
百年歡樂無片時

蓮塘曲

青蘋風起柳塘水波聲夜聒鴛鴦睡一點芳心不自持

露荷又作瑤珠碎藕絲織錦香滿機裁成衣裳將遺誰
只愁賤妾夢魂短不恨蕩子歸來遲花間鷓鴣依芳草
等閒綠遍邯鄲道還應憶念蕩舟人滿架芙蓉鏡中老

學仙曲

二八女人貌嬋娟杏花陰裏競鞦韆同心錦帶刺石蓮
逢人學縛剪刀錢却妬鴛鴦沙上眠

古辭

歡樂自歡樂苦辛長苦辛城中十萬戶誰是種田人

小遊仙

桂閣金銀不甚高
仙山幾許隔波濤
信回青鳥無尋處
一色春風是絳桃

小娃莫說臉如蓮
自牧羊龍向葑田
笑指清泠橋下水
此中原是碧瑤天

青蛇昨夜付書回
只許麻姑自拆開
說道蓬萊山下路
莫因清淺不歸來

柳枝詞

尊前不棄小腰身爭欲攬先上舞茵多謝東風好擡舉
盡情分付畫眉人

春光領畧不勝嬌搖蕩東風千萬條悔盡江州白司馬
一生空詠小蠻腰

輦下曲一百二首

并序

錄十八首

昱備員宣政院判官以僧省事簡搜索舊文彙於
囊中曩在京師時有所聞見輒賦詩有宮中詞塞
上謠共若干首合而目之曰輦下曲其據事直書

辭句鄙近雖不足以上繼風雅然一代之典禮存焉

五垓千陛立朝廷檻首銅鵬一丈翎不待來儀威鳳至
日聞韶濩在青冥

州橋拜伏兩珉龍向下天潢一派通四海仰瞻天子氣
日行黃道貫當中

國戚來朝總盛容左班翹鵬右王封功臣帶礪山河誓
萬歲千秋樂未終

只孫官樣青紅錦裏壯圓文寶相珠羽仗執金班控鶴
千人魚貫振嵩呼

墀左朱闌草滿叢世皇封植意尤濃艱難大業從茲起
莫忘龍沙汗血功

國初海運自朱張百萬樓船渡大洋有訓不教忘險阻
御廚先飯進黃粱

當年大駕幸灤京象背前馱幄殿行國老手鑪先引導
白頭聯騎出都城

華纓孔帽諸番隊前導伶官戲竹高白傘葳蕤避馳道
帝師輦下進葡萄

雞人唱罷內門開千騎前頭丞相來衛士金瓜雙引導
百司擁醉早朝回

端本堂深繡榻高滿前學士盡風騷星河騎士知唯馬
慣識金牋玉兔毫

儒臣奉詔修三史丞相銜兼領總裁卒士院官傳賜宴
黃羊桐酒滿車來

文明天子念孤寒科舉人材兩榜寬別殿下簾親策試
唱名纔了便除官

鑪香夾道湧祥風梵輦遊城女樂從望拜綵樓呼萬歲
柘黃袍在半天中

鴨綠江波勝鴨頭魚龍變化滿中州分來一派天潢水
到得烏桓便不流

昭君遺下漢琵琶
抑軫誰彈狼獲沙
春色不關青塚上
只今芳草滿天涯

圓殿儀天十六楹向前黃道不教行帳房左右懸弓角
盡是君王宿衛兵

閒家日逐小公侯藍棒相隨覓打毬向晚醉嫌歸路遠
金鞭相過御街頭

肩垂綠髮事康禪淡掃蛾眉自可憐出入內門裝飾盛
滿宮爭迓女神仙

塞上謠

雖說灤京是帝鄉三時閒靜一時忙駕來滿眼吹花柳

駕起連天降雪霜

親王捧寶送回京
五色祥雲抱日明
錫宴大開興聖殿
盡呼萬歲賀中興

擬古秋夜長

雲中鴻雁過門前
朔風起梧桐葉落金井頭
月照烏啼天似水
誰家機上織迴文
夜聽啼鳥如不聞
明朝為遣安南使
細意緘題持贈君

御選元詩卷九

謹案第七頁前四行白頭剛傳空勞勞刊本傳訛

傳據張憲 笥生集改

第二十一頁後三行功成萬古蒙天眷刊本天訛

大又兔子花開三萬徧刊本徧訛編並據楊維

楨鐵崖集改

第二十四頁前三行蕩子發航船刊本蕩子訛蕩


蕩據楊維楨鐵崖集改

第三十八頁後二行誰不駐鳴珂刊本駐作住據

張昱廬陵集改

第四十頁前六行青蛇昨夜付書回刊本蛇作虬
據張昱廬陵集改

謹案卷九第十二頁前二行烏納罕舊作伍拏罕
今改



總校官庶吉士臣侍朝

校對官檢討臣蕭九成

謄錄監生臣劉天倉

欽定四庫全書薈要

集部

御選元詩卷十



詳校官原任主事_臣李斯咏

欽定四庫全書薈要卷一萬八千四百二十二

集部

御選元詩卷十

樂府歌行九

王逢

銀瓶娘子辭

并序

娘子宋岳鄂王女聞王被收負銀瓶投井死祠今
在浙西憲司之左逢感其節敬為之辭

蒼梧月落烏號霜寒泉幽凝金井牀綺疏光流大星白

夢驚萬里長城亡女郎報父收囹圄匍匐將身贖無所
官家聖明如漢主妾心愧死緹縈女井臨交衢下通海
海枯衢遷井不改銀瓶同沈意有在萬歲千春露神采
魂今歸來風泠然思陵無樹容啼鵲先王墓木西湖邊
淮安忠武王箭歌題垂虹橋亭

淮王昔下江南城萬竈兵擁雙霓旌錦衣繡帽白玉帶
金戈鐵馬紅鞞纓阜鷗羽箭三十六一一插向魴魚腹
鹿麋晝號猿抱木王師所過全生育彤弓親授聖天子

弓影射入東吳水水波恍浸銅柱標仰見浮屠半霄起
王當是時戢武功指顧草樹生春風宋家降璽朝暮得
思罷貫革垂無窮浮屠上層龍所宮寶盤紺碧蓮花同
弦張滿月報駒發忽露半筈鄉雲中饒歌啁轟鼓笳競
父老頓足歡聲應泗州使返睢陽亡漢關將入天山定
兩賢成敗闕衰盛雄才逸氣王誰並我浮扁舟五湖興
載拜何由重安靖猛士經過合深省

婦董行 并序

婦董滕人劉進妻也進與兄順並以勇稱金季山東亂盜蜂起因共募丁壯保里閭天兵駐澤山進單騎覘之中流矢死順徙家淮南舉室溺淮水董為宋招撫呂文德裨將所獲欲犯之度不免乃謂曰夫喪不遠家難薦臻一身流離婉在旦暮死生非我有願將軍勿疑夜果生一男先是順已入濟州愬於石太尉珪曰順有弟不幸沒於敵其妻在孕為南軍拘幽舟中萬一不得收遺息使弟為厲

實順之罪也惟明公是圖石為發步卒三百人跡其所往次淮陽始知董所在陰使人偵之生子蓋三日矣及見具道順意董悲感不自勝且收淚曰妾以姪不得先夫死今幸不辱先所天使有後皆伯賜敢名此子曰伯祐以志不忘遂抱授偵者目送數十步投江以死至正五年秋進元孫士行語其事於逢逢高其節義作詩哀之

北軍南軍和議時兩壘對立龍鸞旗羣雄棋峙國瓦解

乃與婦董光門楣星辰錯亂風雲氣乾坤造就冰雪姿
渾家性命葬魚腹一舸涕淚隨鷗夸長眠自足為義鬼
後死只望子孤兒兒在腹中兵在目憶夫心頭臂消肉
日晝慘慘陰靈啼夜黑冥冥波浪觸馬駝磧遠暗塵土
雞犬村空疎樹木嶧山誰收白玉骨蔡州地陷黃金屋
太尉前歸明主化招撫姑存寡妻宿羞看人面問消息
強通語笑寬羈束伯順見義勇著鞭銳士協力鋒爭先
道傍弩伏荊棘底掌上珠還江海邊將門有後傳世世

墓祭無所從年年湘妃搵袂遡寥廓漢女結珮窮幽元
縞衣綦巾共縹緲文魚赤鯁長周旋脣亡未久齒亦喪
獨聞其風猶凜然中原山河想如故目斷幾點滕州煙
竹枝詞

溪上鷺兒柳色黃溪邊花樹妾身長浮藻可是無情物
采得歸來好遺郎

道傍花發野薔薇綠刺長條絆客衣不及沙邊水楊柳
葉間開眼望郎歸

小遊仙詞

西王春宴百娉婷
玉碧桃花滿洞扃
自飲一杯瑤屑露
東風吹夢不曾醒

雲幢煙節紫霞裾
齊御冷風集步虛
若受人間塵一點
長門又屬漢相如

壯士歌

明月皎皎白玉盤
大星煌煌黃金丸
壯士解甲投馬鞍
蒺藜草深衣夜寒
劒頭飲血何時乾

寒機女詞

鴛鴦機滿東西舍雪繭繰來日相射世俗競染紅藍花
妾心鍾愛金絲柘君王錦繡焚殿前天孫鳳梭蛛網懸
織成雲霧製龍袞萬一熏香分御筵

君家柳

君家柳萬株一色鶯黃酒龍鱗波暖裊翠煙飛花直渡
江南天倉庚立曉燕穿午薄暮啄木聲丁然腹中樹蝕
皮齧馬舊陰半減金城下長條短條屬行人猶有持斤

睨之者秋來大地落葉鳴心憶陽春淚如瀉

合淝東遂菴學正為畫君山酹月圖長歌奉謝

憶攜蓉城霞

吾鄉酒名

醉賞君山雪興酣俯崖面三酹大江

月靈竒珍怪不可說回首十年塵土熱東卿想像作此

圖如見當時眼為豁是山傑立氣皓鮮四八賓從咸華

顛吾鄉有三十山君山為主

銀濤絲縈料角海

料角池名遠在通州

玉臺鏡

露峨眉煙

峨眉嘴即在君山下

槎牙亂樹拔虎窟撇捩小艇吞龍

淵樵子罷斧僧罷磬木瓢一箇滄茫前君不見江山元

與天地闢有月無人景虛擲崑崙東來幾萬里衣冠雲
散三千客三千客後世屢易曉事僅有羅春伯事見郡志龜
趺榴鬚鬼照火鼇背蒼涼獸交迹君不見采石紫綺裘
赤壁洞簫歌樂者信曠達齷齪將如何歲云暮矣雙鬢
皤夢恍茅屋牽青蘿廣寒白兔下相杵貝闕鮫女趨鳴
梭卿聞大叫當就隱指日莫問魯陽戈

古宮怨二首

錄一首

萬年枝上月團團一色珠衣立露寒獨有君王遙認得

扇開雙尾簇紅鸞

江邊竹枝詞八首

錄四首

亂石研聲大小灣
石中無玉作連環
楚江風浪吳煙雨
翠鎖修眉八字山

社酒吹香新燕飛
游人裙幄占灣磯
如刀江鱗白盈尺
不獨河魴天下稀

巫子驚湍天下聞
商人望拜小龍君
如蘆草染榴紅紙
好剪凌波十幅裙

潮落蟆山連狗沙黃泥鞦浦趁江斜阿儂十指年嬌小

曾比箇中春荻芽

狗叫沙在蔡港西北歲產荻芽予家分佃頃半沙與蝦蟇山鞦浦相連

戴良

三婦豔詞

大婦蕩湖船中婦歌采蓮小婦獨嬌態含羞辭未宣牽
篷掩花面何處不堪憐

艾如張

翠為衿錦為衣朝朝暮暮澤水飛澤中青草深且茂莫

聽爾媒登壘，雖龍頭西接桃李場。蓬蒿艾盡有羅張。羅
雖可避機，莫測爾誤觸之，恐身傷。請看舊日張羅處，祥
鳳冥鴻不肯顧。

游山至葉仲容家飲散因為醉歌

石林古邨鬱深窈，幾處樓居插晴昊。主人喜我攜客來，
隔屋頻呼酒家保。老來厭受樊籠束，十日山行恣幽討。
世間萬事良可知，一杯且此開懷抱。座中高士毛雲莊，
滿腹詩才鬪葩藻。自從偕我林壑遊，得句幾回驚絕倒。

况逢地主亦善詩時出新篇慰枯槁安得思如劉沈輩
席上同吟醉歌好窗縈月練愛宵遲樓度日車嫌曙早
衆賓固盡新知樂賤子獨懷心慄慄有家遠在越水東
數口漂流千里道身心已同風撼木壽命何殊露垂草
柴桑未返彭澤翁同谷空悲杜陵老好斟澗水添酒杯
盡把閒愁醉中埽

題何監丞畫山水歌

至正以來畫山水祕監何侯擅其美帝御宣文數召見

抽毫幾動天顏喜有時詔許閱內儲名筆班班世所無
王吳李范已心識餘者山堆皆手摹海內畫工亦無數
才似何侯豈多遇權門貴戚虛左迎往往高堂起煙霧
人間一筆不可得門外車徒漫如織葉君使還親集送
乘興始肯留真蹟於時在座總儒冠王鄭歌辭晚更妍
豈無片語道離恨見侯之畫筆盡捐此畫攜歸在鄉縣
萬壑千巖眼中見却憶都門送別時回頭瞥覩西山面
莫言短幅僅盈咫遠勢固當論萬里既似山河月裏明

復同衡霍牖中起葉君眼力老愈光愛之不減雲錦章
年來行橐盡拋棄惟將此紙什襲藏何侯遷官定何處
有客披圖正傾慕北騎南轅儻相值煩君為我致毫素
請侯一寫滄洲趣

顧瑛

玉鸞謠

并序

楊廉夫昔有二鐵笛字之曰鐵龍今亡其一偶得
蒼玉簫一枚字為玉鸞以配鐵龍廉夫喜甚復以

書來索賦玉鸞謠志來自云至正甲午三月既望
界溪顧瑛書於柳塘春

七寶城中夜吹笛舞按白鸞三十隻箇中小玉號細腰
尾拂廣陵秋月白伐毛脫骨秋風裏素頸圓長尺有咫
中虛一竅混沌通上有連珠七星子羿妻久閉結璘臺
弄玉求之遺蕭史調得仙家別鵠聲吹落虎頭金粟耳
桂園仙伯楊鐵翁昔秦洞庭雙鐵龍雌龍入海去不返
雄龍鰥處瓊林宮宮中夜夜泣寒雨幽咽悲啼作人語

然犀莫照玉鏡臺
買絲難繫藍橋杵
虎頭憐之為媾婚
并刀翦紙招驚魂
驚之來兮洞房曉
恍然枕席生春溫
鐵仙翁笑拍手
左瓊瓊右柳柳
瓊瓊細舞柳柳歌起
勸虎頭三進酒
畫堂龜甲開屏風
翠煙凝暖春雲濃
大瓶酒瀉鸚鵡綠
滿頭花插鴛鴦紅
驚兮運居巢龍子
弄橫竹君山月落
大江秋黃姑星墮
崑岡玉不須再奏
合歡辭且聽和鸞
太平曲太平曲斷
還續一轉一拍相
節促諧宮協徵宣
八風寒谷能令生
五穀驚龍臺上鳳
凰來

萬歲八音調玉燭

花游曲同張貞居游石湖和楊廉夫韻

真孃墓下花溟濛碧梢小鳥啼春風蘭舟搖搖落花裏
唱徹吳歌弄吳水十三女子楊柳門青絲盤髻鬱金裙
折花賣眼一回步蛺蝶雙飛上春墓老仙醉弄鐵笛來
瓊花起作回風杯興酣鯨吸瑪瑙椀立按鳴箏促象板
午光小落行春西碧桃花下題新題西家忽遣青鳥使
致書殷勤招再四當筵奪得鳳頭箋大寫仙人躡蹻篇

西湖竹枝詞

素雲缺月挂秋河
聽得臨風白苧歌
湖水西來流不斷
海潮東去是風波

陌上采桑桑葉稀
家中看蠶怕蠶飢
大姑要織迴文錦
小姑要織嫁時衣

漁莊欸乃歌

返照移晴入綺窗
芙蓉楊柳滿秋江
漁童欸乃蕩舟去
驚起錦鳬飛一雙

金杯素手玉嬋娟
照見青天月子圓
錦箏彈盡鴛鴦曲
都在秋風十四絃

白雲海銘詞

虞山幾千疊
千疊白雲飛出山
變蒼狗入山為白衣
不如化作雙白鶴
飛向白雲深處落
向余能解說前身不
是當初舊城郭

白雲樓歌

白雲深
白雲深
白雲飛來知我心
笑看觸石起膚寸
斯

須變作漫天陰山人驅雲飛出牖一道龍光射南斗大
星落落小星明萬物區區等芻狗舉手招歸懷抱裏三
日顛風吹不起怒排兩脚走空來卷入銀河一泓水四
野紛紛未倒戈其奈山人不出何有時乘雲釣東海世
上空尋張志和萬松嶺上雲如絮天賜山人作霖注明
朝說與雲中君白雲之樓是常住

白雲深白雲深高樓結在雲中心樓中之人白雲友日
日醉卧梨花陰大笑白雲對戶牖肘後黃金大於斗草

間逐兔縱得之九鼎熱油烹走狗爭如高卧高樓裏未
聽催歸聽喚起釣竿不釣北溟魚酒杯倒吸西江水何
須逐日怒揮戈其若花開雪落何空將朽索馭快馬籊
雲放轡追羲和樓外晴雲擘飛絮手拍闌干目如注青
山排闥四海來面面青山白雲住

顧元臣

竹枝詞

牡丹開時花滿闌芍藥開時春已殘等過三春今半夏

重樓日日倚闌干

顧晉

竹枝詞

楊白花開風滿天
花開成絮不成綿
不如落向西湖水
化作浮萍箇箇圓

郎子別時秋月明
說道歸時春水生
曉起門前聽過馬
嘶都是别人行

顧佐

竹枝詞

阿儂心似潮水清
願郎心似湖月明
南山雲起北山雨
雲雨明朝何處晴

倪瓚

餘不溪詞

并序

開元館在餘不溪濱距溪無百步上清王真人所
立溪流冬夏盈演玉光澄映與他水特異故為名
焉庚午歲春因市藥過浙江趨便道將歸梅里俛

斯水而悅之沂流閒咏盟濯平津顧瞻壇宇近在
東麓遂舍舟造其下真人為出酒脯燕歡巖洞竟
日乃返悠悠徂歲忽已十有七寒暑矣余既為農
畝畝身依稼穡復爾政繁奔走州里欲為昔游其
可得乎鍊師遐騫物表閒情夸朗周覽宇內將還
真館余因仿佛疇昔之所覩極道山之清婉追賦
短章以餞斯別若夫超蹤溷濁逍遙元邁蓋深志
於是矣覽而咏言能無動悲慨乎

餘不溪水涵綠蘂微風吹波感龍鱗看山蕩槳不知遠
兩岼桃花飛接人溪迴路轉松風急竹林華房霞氣濕
忽逢道士頎而長疑是韓國張子房相期飄拂紫煙裏
下攬滄溟浮玉觴

醉歌行次韻酬李徵君春日過草堂賦贈

杜陵昔年有茅屋浣花溪邊錦江曲古人不見春風來
桃李無言自山麓石牀蘚澀青泥乾決渠流水夜潺湲
可憐寶劍埋黃土空餘山月照波間今我不樂空懷古

短世長年誰比數花下那知李白來山鳥恣歌童亦舞
酒酣大笑五情熱作相形求築巖說夷齊相逝居首陽
逍遙采薇飽芳潔勿歌虞夏黃農詩賢愚等是百年期
魯連恥秦亦蹈海笑爾局促商山芝少文壁間對圖畫
莫待老來難命駕仰看翕忽浮雲馳安得乘螭與之化
漠漠楊花縈遠天迸壑晴雷驚醉眠李侯神爽色不動
手中茶雪落輕煙逢君此樂誠草草便欲攜君卧煙島
海上千年白鶴飛世人胡為而自老

竹枝詞

并序
錄四首

會稽楊廉夫邀余同賦西湖竹枝歌余嘗暮春登
瀕湖諸山而眺覽見其浦溱沿洄雲氣出沒慨然
有感於中欲託之音調以申其悲歎久未能成章
也因覩斯作為之心動言宣為詞凡八首皆道眼
前不求工也

錢王墓田松柏稀岳王祠堂在湖西西泠橋邊春草綠
飛來峰頭烏夜啼

湖邊女兒紅粉妝不學羅敷春采桑學成飛燕春風舞
嫁與燕山遊冶郎

春愁如雪不能消又見清明賣柳條傷心玉照堂前月
空照錢唐夜夜潮

嗷嗷歸鴈度春江明月清波鴈影雙化作斜行第上字
長彈幽恨隔紗窗

聞竹枝歌因效其聲

鈿山湖影接松江橘葉青青柿葉黃要寫新愁寄音信

西風斷鴈不成行

江流不住楚山青
船到潯陽幾日程
不忍寄將雙淚去
門前潮落又潮生

惻惻行

并序

三月十五日陸元素將從梁鴻山歸吳淞之上是
夕坐至夜分始別予入舟賦此追至梁鴻山寄之
以定及冬重來之約

惻惻復惻惻憂思從中發
感子遠來訪畏子遽言別不

有同心人何以慰孤寂矧茲夏春交蕭艾盈路側江水
亦浩漾風帆還飄突行將阻攜手轉覺意忽忽交好匪
在今高誼敢自昔人生寧無別所悲歲時易坐歎辛夷
紫還傷蕙草碧僕夫竊相告怪我悲憤塞山中梁鴻栖
江上陸機宅井田今蕪穢鶴唳亦寂寂子往經其墟徘徊
徧但陳迹天地真旅舍身世等行客汎汎何如損皎皎
奚自益修短諒同歸數面聊歡懌

郊韻

寄遠曲

朔雪滿天山，征人去不還。
惟應隴頭月，照見玉門關。

伐桂辭

莫斫桂樹，莫斫桂樹。
上有慈烏反哺，桂樹有花，慈烏有母。
實傷汝心，匪傷汝斧。

次韻倪元鎮雙燕吟

雙燕雙燕，復雙燕。
年去年來，幾相見。
東風花落杏梁深，不比朝飛雉帶箭。
主人長年不知還，夢隨胡蝶千萬山。

人生那似雙飛燕去去來來梁棟間

望潮曲

夕風吹白波江樹搖綠煙行人望湖水心與滄溟連
樽桑東來三萬里曉看浴日重淵底迺知碧海與天通只
隔銀河一絲水美人住在東海頭身輕嫁與千戶侯頻
年轉粟直沽口檣頭夜夜望牽牛

石榴花辭

石榴花為誰好一樹垂垂向官道年年花落復花開不

覺前年人易老去年花開白日長長官載酒來稱觴流
鶯蛺蝶共飛舞不惜醉倒花樹傍今年花開秋可憐累
累結子滿樹顛無人載酒花下飲只說花開勝去年去
年今年兩結子雨露生成有如此人老不似花再開莫
惜載酒花前來

西湖竹枝詞六首

錄四首

十五女兒羅結垂照水學畫雙蛾眉長橋橋下彎彎月
偏向儂家照別離

妾家西湖住橫塘門前楊柳萬條長憑郎醉後莫折斷
留待重來繫馬韁

闌鎖六橋春水深鴛鴦瀟瀟蕩人心吳兒生長自吳語
却向船頭學楚吟

湖上荷花嬌欲語湖中女兒木蘭舟荷花折得渾自好
只恐荷盤不耐秋

春江曲送唐閔之入關

二月春草青三月春水肥楊柳蕩洲渚胡蝶作團飛美

人向何處望望隔煙霧迢遞越王城
青山海中樹海水高入天上與銀河
連相思瘴雲合目送南飛鷺

姚文奐

竹枝詞四首

錄三首

儂家只在斷橋邊勸郎切莫下湖船
湖船無柁難輕託白日風波在眼前

冰肌玉骨自清涼藕花十里錦雲香
一朵紅衣初脫卸却將蓮子打鴛鴦

家住西湖第四橋自從卅角學吹簫年來愁得兩鬢雪
吹盡春風那得消

呂誠

江水辭送友人之龍江

江水一百里南風一日程飛花多意緒相逐柁樓行
江水五百里上有蘭與芷采之遺我思含情似江水

采蓮曲

刺船水中央攏船乘晚涼近菴灘上過葉裏好鴛鴦

盈盈藕上花采采墮清淚願將心中絲繫君雙玉珮

蹋鞠篇

江南稚女顏色新百花樓前蹋繡輪紅蕖小韞不動塵
不動塵放嬌態微風來舞裙帶

芙蓉小蹋蹋曉風金碧步搖聲丁冬繡衫窄窄交斜紅
交斜紅露玉腕揮紫綿浥香汗

周砥

放歌行贈宋君仲溫

今日非昨日今年非去年天地不同老日月豈停旋寸
心遙遙顏色改只似秋蓬與夏蓮柏梁賦詩不早上長
楸走馬未得前閭闔九重虎豹守我欲上訴無因緣荆
山泣玉徒自苦夷門抱關誰復賢寶劍夫容拂秋月高
歌對酒聲哽咽當時輕意千古事幽憤於今向誰雪蘭
臺公子天下奇心膽豈足他人知荆卿不荅魯句踐項
羽豈顧齊安期東吳市上花漠漠相逢意氣傾山嶽笑
說秦關百二重舒卷風雲不盈握一生不識平陽奴况

是霍家馮子都明珠白壁等糞壤玉環翠袖皆蟲蛆甘
心廓落事屠釣矯如游龍不可拘宋公子爾彈琴我放
歌白晝苦短夜何多黃金高臺幾千尺翳日浮雲奈若
何

張簡

醉樵歌

東吳市中逢醉樵鐵冠敝側髮飄蕭兩肩矻矻何所負
青松一枝懸酒瓢自言華蓋峰頭住足跡踏遍人間路

學書學劍總不成惟有飲酒得真趣管樂本是王霸才
松喬自有煙霞具手持崑岡白玉斧曾向月裏砍桂樹
月裏仙人不我嗔特令下飲洞庭春興來一吸海水盡
却把珊瑚樵作薪醒時邂逅逢王質石上看棋黃鵠立
斧柯爛盡不成仙不如一醉三千日於今老去名空在
處處題詩償酒債淋漓醉墨落人間夜夜風雷起光怪

和鐵崖小臨海十首

錄六首

海靜不揚波仙人控鶴過靈峰七十二何處月明多

扁舟下彭蠡望見古君山只道支機石移來天漢灣
歌罷霓裳曲分行舞廣庭天壇看星斗散亂若浮萍
夜過洞庭曲青山玉作堆仙人吹鐵笛白鶴自飛來
仙花雲萬疊浩劫與春開却笑珊瑚樹焦枯作死灰
海上三神嶠嘗看羽蓋飄玉虹三百丈噓氣結成橋

李瓚

柳枝詞

吳江綠水生春明江上柳枝今漸青棲鳥啞啞中夜鳴

愁絕東風長短亭柳枝當戶森成束思婦正倚闌干曲
別情有恨不可解萬里相思淚盈掬愁多不織流黃機
織得迴文更慙悽功名悞人不足恃橐砧橐砧何日歸

春草曲

春風百草生何許伊流之洲澧之浦荃蘅蘭蕙與芳杜
馨香采色紛無數鷓鴣先鳴衆芳舉萬綠如煙花欲語
王孫遊子去湘楚蘼蕪開謝山之阻春草無情情獨苦
別離恨深迺終古春草生淚如雨

歸鴻曲

高秋鴻雁來仲春鴻雁歸關河道路遠沙場聲韻悲去
年曾寄帛書去迴文織就相思句橐碣遠在邊城戍高
樓不見絕心緒愁多別久淚闌干何日歸來再合歡一
聽歸鴻一生怨揚子江南春雨寒

擊楫行

日華悠悠江色清碧波萬里生春明商婦琵琶怨別生
擊楫渡江舟正行美人美人既無情澧蘭沅芷揚芳馨

欲見不見心怛怛輕風吹羅裳擊楫且勿忙恐驚菰蒲
中交頸雙鴛鴦莫學桃根與桃葉渡江一去音信絕江
上春來復春去對此流光淚盈睫

戴勝行

江臯春暖桑盈野三農耦耕蠶事舉嗟爾戴勝胡為來
乃有鳴聲驚織婦戴勝來降於桑采采麗羽何清揚天
時月令仍相當茲禽一鳴穀雨至農人聞之興耒耜蠶
成繅絲秧及時

陸友

桂之樹

桂之樹褰我衣秋風昨夜起遊子送將歸明年春水盛
鼓櫂下江磯

張師賢

和西湖竹枝詞

孤山脚下三叉路孤山墓上好梅花不似馬塍桃李樹
隨春供送到人家

沈性

和西湖竹枝詞

儂住西湖日日愁
郎船只在東江頭
憑誰移得吳山去
湖水江波一處流

衛仁近

秋夜曲

誰家女兒青結螺
花前雙歌舞婆娑
湘簾在鉤明月多
奈此迢迢涼夜何

銀河流光夜初靜
姮娥娟娟度
鷺影綺疏美酒醉方醒
倚闌吹簫更漏永

繆侶

和西湖竹枝詞

初三月子似彎弓
照見花開月月紅
月裏蟾蜍花上蝶
憐渠不到斷橋東

馬磨

春夜樂

越羅複幔茱萸紅
感金繡帶蟠雙龍
銅盤膩燭傳香蠟
簾箔星光釘文甲
金刀割紅翠釜烹
豈寇壓春頰玉嬰
神仙舞盤踏月行
鴈沙印雪留雲纓
朱絲泠泠金粟柱
風流上客瓊林主
碧海煙中采香婦
濕花仙骨霑春雨

和花游曲

綺樓十二浮空濛
寶衣翠絡熏麝風
宮妝窈窕銀屏裏
鸚鵡呼名隔江水
荔枝木瓜花覆門
珠珮丁東搖曲裙
館娃宮裏潘妃步
羸得一丘紅粉墓
探花仙子何處來

乳酒百罰行深杯
夜闌酒倒揮玉椀
遮莫城頭催漏板
人生一身東復西
花游日日須留題
尚記題詩動宮使
字落驪珠三十四
金花重賜五雲箋
製作清平樂府篇

獨酌謠

獨酌謠獨酌當中宵
中宵萬籟寂獨酌興歌謠
玉露下金井銀河沈素濤
一酌再酌神思超安得十洲仙人共
傾倒駕風鞭霆歷覽八極同遊遨
魯戈莫揮斥羲車莫招搖
便當甕頭醉笑解黃金貂
君不見車輪馬足長安

道雞鳴五更天未曉又不見北邙風雨跡如埽石駝斷
碣眠秋草天飈泠泠吹我襟獨酌獨酌慰我心流光去
人那復得洗盞自歌還自吟

岳榆

漁莊欸乃歌

文竿比日出清波翠袖香醪金叵羅涼月團團當檻白
秋光冉冉隔簾多

黃花丹樹老漁莊錦瑟秋風子夜長驚起水禽棲不穩

金
卷十
背人飛去不成行

袁嵩

漁莊欸乃歌

秋水芙蓉面面開
錦堂低護小蓬萊
夜深莫把珠簾下
恐有青鸞月底來

玉人花下按涼州
白鴈低飛箇箇秋
彈徹驪珠三萬斛
當筵博得錦纏頭

文質

月漉漉送瞿慧夫之練川

月漉漉在婁水老蟾千年浸不死容華已萎春蕙芳弦
望茫茫運天髓月漉漉在練水桂影無煙玉如洗一天
清吹涼參差琉璃碧破飛魚起我家月明滄海曲漁歌
不驚鷗夢熟脫巾醉卧竹葉舟白頭浪起高於屋送君
行月漉漉

折楊柳

折楊柳煩纖手金黃細縷牽春愁送客年年汴河口汴

水明楊柳青此時傷心無限情同心結就孤舟行折揚
柳君知否有書莫寄雙鯉魚一度春風一回首

白雲海歌

白雲深白雲深白雲深處元無心眼空瑤海一萬里山
光不動秋陰陰虛白英英啓局牖袖拂天開落星斗盡
隨玉氣化為龍不逐西風變蒼狗道人高居白雲裏九
重丹書徵不起三生石上話因緣春夢梨花隔秋水風
塵眯目橫干戈龍吞虎噬奈爾何斷蛇神器未出匣海

宇無復春光和世事紛紛為落絮百歲流光水東注白
雲與我有深期我亦相依白雲住

顧敬

和西湖竹枝詞

樓船女兒日晚歌蓮心結子綰雙螺湖水蕭蕭湖月白
奈此湖中涼夜何

陸仁

春波曲

青青太湖波小小芙蓉楫舟輕弗解操水深那敢涉

野田雀

野雀飛在田化為田中鼠黍稷動連雲鼠食那知止

柳枝曲

朝垂金門雨暮拂玉闌風飛絮高高去枝葉在深宮

缺月詞

月體無虧缺日照乃自偏安得長合璧與天相周旋

精衛詞

精衛兩翼大飛向海波去口銜石子不知數山高高海
深深山高水深石自沈

招鵠詞

黃鵠兮黃鵠騫翮兮扶搖一飛兮絕泰華再飛兮冲層
霄鵠兮無弟與兄若將求其曹於乎鵠兮心怕勞燕雀
在樊兮食且飽樂且不憂中林有木兮木有巢鵠乎歸
乎無遠遯

石婦詞

鳥鳴孤竹岡春花復斑斑江水日東落行人殊未還
妾孤處妾之心白於水水白泥可渾妾心潔且明望夫不
歸那忍生精神忽通化為石千秋萬年岡上立

思公子寄馬希遠

蟋蟀兮在戶菊始花兮婀娜擘芳兮延佇思公子兮江
之左荃橈兮桂旂江流兮泌清絙朱絃兮橫琴茶甘如
薺兮楚酒馨宛迤兮婁水蘼蕪黃兮夕雨婁之上兮有
園與廬思公子兮歸乎樂只

漁莊欵乃歌

并序
錄二首

至正辛卯秋九月十四日玉山燕客於漁莊之上
芙蓉如城水禽交飛臨流展席俯見游鯉日既夕
天宇微肅月色與水光蕩搖櫺檻間遐情逸思使
人浩然有凌雲之想玉山俾侍姬小瓊英調鳴箏
飛觴傳令歡飲盡酣玉山口占二絕命坐客屬賦
之賦成令漁童樵青乘小榜倚歌於蒼茫煙浦中
韻度清暢音節婉麗則知三湘五湖蕭條寂寥那

得有此樂也賦得二十章名之曰漁莊欸乃歌云
灣灣流水曲闌干鷗鷺芙蓉不耐寒玉手為開銀屈膝
舉頭却見月團團

日暮休憑鬪鴨闌落霞飛去水漫漫秋光都在重屏裏
東面青山是馬鞍

沈右

和西湖竹枝詞

勸郎莫向花下迷勸郎莫待醉如泥臨行更有分明語

枝上流鶯休亂啼

張田

西湖竹枝詞

潮去潮來春復秋
錢塘江水通湖頭
願郎也似江潮水
暮去朝來不斷流

舒頔

百牛圖歌

繫誰畫此百牛圖
綃素淋漓懸兩壁
摩挲細認角頭奇

無乃戴嵩留宦墨牧童騎策過前邨春樹陰陰春草碧
雲收霧斂山花明遠近巔崖翠光濕平湖斷岼水淺深
皺縠粼粼如展席犢眠草間牛不乳飢齧青芻礪蒼石
或飲或浴雲滿身物我相忘祇自得橫斜體態百頭殊
牧豎籠雛戲阡陌有時背上顛倒騎細雨斜陽橫短笛
時平放爾桃林中布穀催畊苦相迫嗚呼比年兵革彌
天下千畦萬隴生荆棘只今農父把鋤犁處處開畊皆
爾力斗米三錢戶不扃四海蒼生無菜色

織婦吟三首次知縣許由衷

妾家住西湖家貧守清素年方二十初學織常恐暮父
母生我時不識當門戶夫君良家子安肯受辛苦

機織不畏多但畏官府促去年布未輸今年糧未足阿
姑八旬餘縮首檐下曝君成憂邊庭妾心念機軸
亂絲入手中上機十數匹細花間鸞皇精巧俗莫測朝
餐釜底焦下盡雪下滴君心似明月願照塵苦力

絡緯吟

夕露淒以清涼颼然至籬根斷續聲長繭縹絡緯雙
股依草茲兩翼鼓元氣月明更漏遲似訴無限意微物
尚知時歎彼非物類我懷素瀟灑聞汝澹忘慮

江南曲

庭院深沈日正長綠窗紅几繡鴛鴦落花風起傳鍼看
胡蝶雙雙過粉牆

縑絲歎

東家縑絲如蠟黃西家縑絲白如霜黃白絲出琵琶口長

短纜出婦手大姑停車愁解官小姑剥繭愁冬寒向來
苦留二月賣去年宿債今未還手足皸瘃事亦小官府
鞭笞何日了吏胥夜打門稚耆生煩惱君不見江南人
家種麻勝種田臘月忍凍衣無邊却過廬州換木綿

舒遜

織婦吟

錦織並蒂花花成謾停梭停梭復細看人與花如何明
月照中天敗葉鳴寒柯誰知恩愛心翻成離恨多

雙星照短牖孤月懸高枝仰睇星月明對此令人悲手
持并州刀為君裁寒衣不忍密密縫此心君應知

周霆震

武昌柳

武昌柳青如許舊恨新愁千萬縷宮鶯去盡野雞栖
憔悴江南誰是主朔風一夕捲栖鴉春日鶯啼憶舊家
流落王孫重繫馬雨晴天氣屬楊花

軍中苦樂謠

半臂纏腰帽卷羶剪裙荷葉腿齊編市西橋外看屠狗
笑擲并刀賭酒錢

堆帽紅纓間黑纓粉青宦袴短黃裙酒樓突過行人避
近日新充水砦軍

旌表門前路幾彎浮圖坡下日銜山馬上長身單白紵
雙雙緩轡打球還

短髮風欺破帽斜日西跣足踏紅沙妻孥待哺不遑卹
流汗擔柴赴主家

疊石支牀擁敗氈抱闕擊柝日隨綠松燈自抱芒屨了
要辦明朝買菜錢

劍鋒交處奮身跳箭集征袍血未消奪得紅巾衝陣馬
歸塗乾被長官要

官船公子抱琵琶笑指娼船白藕花今夜江頭好風月
買魚載酒宿誰家

團扇題詩愛越羅畫船載酒沸笙歌何人夜讀張巡傳
獨占秋江月色多

十里長洲列戰船
白頭吟客坐看天
何時得見三階正
獨寄篷窗夜不眠

楊柳枝詞

離宮別館短長亭
忘却江南舊日春
是處人家種楊柳
往來繫馬解留人

背立東風淡畫眉
斷腸煙雨一枝枝
隋宮漢苑春無主
莫向江南話別離

移栽楊柳受風多
南畔行人北畔過
莫道浮萍是飛絮

好隨流水到官河

舞絮含愁入酒家何因得近瑣窗紗
春風萬一無拘束
放去錢塘逐落花

楊翮

金谿縣孝女廟樂歌

并序

有元至正元年撫州路金谿縣新作二孝女廟成
按二孝女姓葛氏在唐寶曆間以官責其父祐虧
鍊白金事不勝暴酷皆發恚投冶中焚死父因獲

免并其邑除坑冶之害以迄於今是宜血食其土
矣國子博士吳君師道既文之石而祀神之詩闕
焉上元楊翮撰為樂歌三章俾金谿之民歲時歌
之以祠孝女其辭曰

靈之來兮兩旗張導旌幢兮鏘琳琅續曖曖兮相頡頏
並輜輶兮歸故鄉歸故鄉兮民所望昭盼嚮兮習洋洋
庭燎輝兮夜未央椒蘭發兮鬱芬芳民報祠兮弗敢忘
心屏營兮咸肅將靈格思兮民樂康

靈之留兮澹容與雲凝凝兮翳堂宇瓊筵陳兮合簫鼓
列尊壘兮酌清醑牲肥腍兮承雕俎女巫進兮傚屢舞
誦神德兮歌頌舉孰捐軀兮悟時主齊英英兮惟孝女
繼茲今兮饗終古靈醉飽兮民樂胥

靈之去兮將安之儼欲旋兮焱上馳互招搖兮爛祈祈
遵雲路兮眷威遲金有賦兮地不遺竭貨產兮民力罷
我邑井兮咸熙熙賴神惠兮獨弗罹千萬禩兮神是稽
薦蘋藻兮荅神釐靈遄逝兮民聿思

張端

賓鴻吟

鴻鴈來天雨霜鴻鴈去春日陽鴈來鴈去如嘉賓寒寒暑暑愁殺人一聲叫落秋空雲不覺淚下霑衣巾如賓又復如兄弟吁嗟人兮不如彼

白苧詞送孟季成崇明同知

歌吳歌舞吳舞吳兒蹋浪鳴雙櫓春風袞袞送行舟新除使君衣白苧君衣一何素娟娟照青年飄搖舉長袖

亦足相迴旋白衣之白白於鷺看時莫使緇塵汙

吳志淳

鍾陵行

并序

真定劉生客死閩中同行者為歸其骨其妻胡氏
自圖夫容以祀因哭而絕鄰人憐之遂合葬鍾陵
東門

鍾陵東門白楊樹行人指點是雙墓墓中夫婦俱少年
一雙白壁葬黃泉黃泉相逢語嗚咽一一從前向郎說

前年郎去客三山今年郎歸白骨還當時自畫蛾眉樣
今日却寫郎容顏容顏轉似心轉切叫郎不應心斷絕
生時不得逐郎行死時却與郎同穴丹青遺像留人間
年年淚竹寒生斑當年曾過延平渡還見雙龍化劍灣
堂前既無父與母堂下又無兒與女使妾有子堂有姑
丹心一寸那能枯六朝盛事付流水忠義幾人能到底
秋風月冷鳳凰來與郎同上吹簫臺

留睿

思親行寄弟子通

今年八月來作客出門倏忽日一百自從二十走湖海
零落天涯幾岑寂幾岑寂重悲歎親在高堂望子還子
在長塗衣亦單準擬明年作官食君祿歸來共汝舞袖
紅徧爛天目之山去天不盈尺使我登之徘徊望鄉國
吁嗟胡不生羽翼吁嗟胡不生羽翼

鄭洪

大姑謠

大姑嫁將軍小姑未有夫小姑兩脚泥大姑滿頭珠前
月小姑去嫁作莊家婦釵削鬟下荆衣裁機上布大姑
嗔小姑生憎兒女癡多少馬上郎偏愛牧羊兒八月點
軍卒將軍五門出大姑詫夫壻上馬快如鶻昨日邊報
歸大姑淚如揮郎君馬上死無處寄征衣連理與枯枝
雙飛成戢翅都無百夜恩浪作千歲計小姑莊上來瓦
盆雙鯉鮐上堂拜父母夫婦恣歡諧大姑見小姑珠翠
無顏色低頭怨悵天仰天呼不得人生百年良所無白

頭相送真良圖東家女郎欲嫁夫切莫猖狂學大姑

城上烏為李僉憲賦

城上烏飛畢逋雄飛啞啞雌者呼下飲九曲之清池上
集百尺之高梧烏烏一巢生九雛去年築城興萬夫家
家力役到妻孥使君勗吾我力痛蒸豚滿筐酒滿壺作
勞耳熱歌嗚嗚今年城堅如鐵石弩臺侵弓土花碧白
雲為藩樹為戟朱旗星流落日赤馬鳴蕭蕭人寂寂六
門虎賁晨晏食城頭高高如屋極烏朝出飛暮來息雌

雄哺雛乳而翼城上烏畢逋尾九雛羽翼成飛去青雲
裏江南無好樹處處烽煙起危枝繞遍不堪棲昨日歸
來舊巢底使君青驄馬繫在垂楊下手中金僕姑不驚
城上烏思情雙飛鳥遺愛在中吳使君去幾時回新城
高百雉仰德並崔嵬

王中

長門怨

昭陽歌吹入獨自淚雙垂玉貌無如妾君恩復在誰涼

風搖繡戶明月墮金閨愁絕無人見流螢點翠帷

華幼武

鴈南飛

鴈南飛飛不住暮暮朝朝不穩棲飛向水窮山盡處水
窮山盡天南頭年來有客離家愁天空無雲明月夜千
里萬里清光流家園零落秋風遍人聞鴈聲淚如綫鴈
兮鴈兮可奈何稻梁多處多網羅

編籬曲

編竹籬密密編朝禦雞犬入暮防豺虎穿交加編聯互
相倚竹密藤纏堅莫比春風披拂百花開一片繁華如
錦綺君不見西家有籬編不密夜夜驚呼防盜賊願言
兄弟莫相疑明日齊心編竹籬

養竹軒歌為周莊吳達子道賦

高軒公子良不俗不種奇花種脩竹奇花照眼一時紅
脩竹虛心萬年綠春雷擊地新筍生龍角森森那忍觸
自鉏暖土厚栽培手挈銀瓶細澆沃深根埽除螻蟻窟

香葉終期鳳凰宿日使霑濡雨露恩歲寒豈憚冰霜酷
猗猗繞戶矗琅玕含霧連煙比淇澳招搖皓月金瑣碎
勾引清風聲夏玉炎天展簟卧蒼雪春日聽鶯泛醺醪
可能一日暫相忘坐對此君看不足君不見白樂天重
言養竹比養賢又不見東坡詩無竹士俗不可醫君今
有竹善培養會看直拂青雲上

葉顯

漁父曲

雨過暮雲收江空涼月出輕蓑獨釣翁一曲秋風笛宿
鷺忽驚飛點破煙波碧

采蓮歌

越女浙江頭煙波萬頃愁往來荷葉浦蕩漾木蘭舟島
闊香雲冷江空明月秋清謳三四曲聲斷白蘋洲

御選元詩卷十


謹案第三頁後七行銳士協力鋒爭先刊本鋒爭
作爭鋒據王逢梧溪集改

第六頁前六行卿聞大叫當就隱刊本當就訛就
當據王逢梧溪集改

第九頁後四行尾拂廣陵秋月白刊本陵訛林據
顧瑛玉山璞藁改

第十七頁前八行郊韶刊本郊訛刻今改





總校官庶吉士臣侍朝

校對官檢討臣蕭九成

謄錄監生臣劉天倉